

國朝畿輔詩傳

國朝畿輔詩傳卷十

長洲陶 樑鳧薌輯 錢塘吳長卿更生校

申涵光

涵光字和孟一字孚孟號鳧盟一號聰山永年人貢生舉孝行辭不就聰山集八卷

四庫全書提要聰山集十四卷申涵光撰涵光字孚孟亦作符孟又曰和孟復自號曰鳧盟取與符孟字音近也明太僕寺丞佳允子是編首列年譜傳志一卷次文三卷詩八卷附荆園小語一卷荆園進語一卷皆所作語錄也畿輔通志涵光博學能文尤長於詩弱冠名噪三輔晚年名益重與殷岳張蓋稱畿南三才子魏裔介傳鳧盟少穎異博涉經史下筆爲文章高潔宕逸超出尋常蹊徑外顧善爲詩端愍公游宦四方在家鍵戶不干戶外事甲申避地廣

羊山與鉅鹿楊猶龍鷄澤殷伯巖爲患難交會
京師陷端愍公殉難扶柩旋鄉力耕課二弟誦
先人遺書足蹟絕於城市鳧盟既屢蹟場屋又
痛端愍公殉難春露秋霜環冢而號時詔郡
縣辟舉孝行有司欲以鳧盟名應力辭之上書
曰孝道至大昔賢所難光雖不肖豈敢以終南
片席爲梯榮地哉有司乃止同郡中表王襄璞
爲山右方伯邀至署未幾歸襄璞訝其速答曰
此中有高士傅青主貧居不能蔽風雨公以身
下之勝於光之留多矣襄璞爲之捐俸買宅一
時傳爲盛事辛丑弟涵盼成進士選庶常鳧盟
亦貢入成均辭病不赴廷試曰吾才不堪仕
宦耳丙午弟涵煜登鄉薦戊申詔舉山林隱
逸之士余謂鳧盟稱其高亦遂已鳧盟詩一以
弟隨叔婉辭余欲成其高亦遂已鳧盟詩一以
少陵爲宗而沐浴於高岑王孟性不喜釋老解
琴理交友不濫生平同聲氣者不過數人拯危
扶屯挽殷伯巖於寇難賙李志清於戍邊赴義
有如饑渴取與間一毫不苟晚而學益進悔名
之爲累也蓬蒿滿徑長吏式廬者遯避不出官

其地者愈重之邑人執贄問

字者亦不拒卒年五十九

鄧漢儀序鳧盟之詩遡源樂府取法少陵而溫

柔敦厚一秉三百篇之遺意故其旨緒蒼涼小

雅之諷諫也哀樂中情國風之贈答也稱引先

世蓼莪之微情也顧瞻宮闕率土之深感也以

至零篇雜著莫不討核源

流而大翼乎性情風教

池北偶談申鳧盟同學多爲大官申獨隱居不

出有故人自京師寄書申報以詩云日日秋陰

命筍輿故人天上落雙魚荷花未老新

醪熟爲道無閒作報書其簡傲如此

汪琬說鈴申鳧盟五七言詩氣體極高老子尤

喜其七言絕句含蓄淒淡使置唐人詩選中未

知可與

誰比

王暉今世說申涵光父節愍公盡節

後以理學訓其兩弟皆能立身揚名

茶餘客話申鳧盟見蘇門先生後大書於門曰

真理學從五倫做起大文章自六經得來

國朝畿輔詩傳 卷十

二

紅豆樹館詩話鳧盟隱不違親貞不絕俗同時
鉅公皆以古獨行見推而鳧盟遂得於泉石餘
閒研求聲律畿市詩教自君大振聽山集古體
取材魏晉近體專學唐賢脩然塵壑之表誠風
騷之矩矱雅頌之正宗宜王企
靖七家詩選中取爲歷卷也

歲晏

束髮未更事姓名慚不張遠遊就賢達斯道相扶將但
抱椒蘭馨不虞荆棘傷揚眉關時輩一息週八荒登高
望古人顧影恒悲涼毀譽互因依崎嶇變否臧中宵起
長歎欲晦迹無方羨彼沈冥徒空外恣翱翔

歲晏百物息草木隨風沙松柏慘不舒况彼園中花層
陰晝蕭條微霰時復加林中常鳴孤屋上常鳴鴉豈不

思遠遊負手還咨嗟陽氣動飛灰枯荑漸萌芽嚴威蘊
華滋深藏古所嘉

東鄰富珠玉華屋眉常顰西鄰褐不完絃歌無冬春人
生各有適苦樂豈關身詩書敦古懷山川多嘉辰斗酒
良亦娛况遇同心人寄語結駟客莫憐原憲貧

聞昔高隱流賣漿與賣卜旣以緇其光又以供口腹聞
閭競刀錐疾毒生梁肉仰愧棲風蟬俯羨悅草鹿四體
惰不施於何望麥菽早稅安鷄豚鞠躬謝多福春風坡
草青戴雨牧黃犢

少年矜意氣抵掌瀝肺肝尊中酒尙溫談笑生波瀾但

念今時非不言昔時驩寵歇難爲容罪誤誠多端昔當
貧賤中努力同艱難

拂纓著明信結交盡豪能戊衣謁皇甫折柬招李膺長
嘯望天闕頗爲時所矜良會倏雨散車馬隨奔崩覩顏
弱寒谷寸心無所憑真鴻負青雲稻粱多繳贈覆我白
玉杯解我朱絲繩鍾期難再覲山水誰復稱

荆吳隔大江風濤不可涉短衣淩荒岑拄槩撥寒月元
雲閉河梁故人書久絕目招誰家兒輕揚弄綺陌投我
蛺蝶羅縵以雙玉玦我畏不敢過中途自改轍弱草披
澗陰梧桐峙高闕本非同根生榮瘁應各別

我有太阿劍寶氣常干霄飾以藍田玉淬以鵠鵝膏出入常相隨有如貧賤交時平適不用共棄荒山坳田父傾之笑欲刈蕭與蒿

盛名難久居直木誠易傷試觀繞指柔豈盡常悅康乘威自啖食華膺擬未央白日照中天林葉難爲霜歧路各踟躕君子務謙光

夜坐

積雨晦深巷高梧滴清響浩然天地間秋風生餘想夙昔寡疑慮萬事如在掌多難志氣衰歲月空俯仰含辛對落葉朋遊半宿莽常愧古人言識道年已長出門望

四方道路多魍魎白雁叫霜空孤燈照書幌

懷路氏妹避亂江南

大江渺無極有妹隔絕久豺狼滿道塗衡門但株守四
年闕會面憂來淚盈斗憶昔避亂初蒼茫舉家走兩甯
難爲別纔爲兩月婦地圻良木摧變生別離後我父競
臣節嗟哉萬古壽賊帥索金珠衣冠困枷杻脫身來江
臯痛哭吳山口相見如夢中驚魂暫聚首輦金視權要
進用雜糧莠吁嗟咸陽焚胭脂井重圯徒步返故山荷
鋤事南畝雖因母在堂偷生愧顏厚汝浮炎海濱家園
空戶牖淮北長蒿蓬兵戈亂江右估客頃南行寄書知

達否風波萬里外天命復誰咎不敢常酸辛強笑慰慈母

春遊

風沙蔽遊目久早春蒙籠城中草青出無乃園花紅今
晨雲日好壺觴招所同出門池水淨纖鱗亂碧空溪柳
鳴布穀滿路迎飛蟲散行無定步時入麥畦中桃梨間
緋素因嗟造化工先子昔南歸角巾對鄰翁手植數竿
竹繞舍成寒叢揮酒澆竹根再拜來清風瘡痍日未已
城巷生蒿蓬我園適無虞嘉會復難逢頻來無早暮塵
世俱怱怱

送宋玉叔吏部兵備隴右

燕雪照西山，邊風吹去馬。
袖手如懷冰，離觴豈堪把。
我初入都時，君方罷藤署。
傾心縱譚諺，恐我先歸去。
君今官赴秦，晝戟雙朱輪。
念我胡留滯，翻作送歸人。
征塵如飛霧，漸轉烟郊樹。
望君久駐立，亂笳催薄暮。

將出都留別故人

蕭寺客已久，鄉心亂歧路。
將歸翻不樂，踟躕爲朋故。
十載棲雲岑，舊遊隔烟樹。
豈不勞夢魂，田父戀場圃。
重來如夢中，傷心歷歲暮。
所幸文章伯，招尋忘旅寓。
放歌無醜顏，有懷盡傾吐。
脂車期屢移，馬鳴亦迴顧。
吁嗟各努

力出處保貞素

家誠示舍弟觀仲隨叔

我由自晉疆上世渺難紀肇始掖縣公征車憩洛水徘徊望都邑山川鬱奇理於焉遂卜宅掛冠尋黃綺維時草昧初林墟雜戰壘地多流允人食力而野鄙令德倡詩書揖讓成仁里孫枝日以繁忠厚有懿軌

徵君勵高節譚經繼扶風元纁兩及門謝病老樵農方當盛明時仕宦多從容好爵良足慕性本耽雲松脫身榮辱場孤鶴隨奇蹤

猶歟汝南公窮居饒規畫聖祖駕北巡遂上濟時策做

衣抗高言天顏喜動色委絡登朝堂望陟容臺席天中
喪亂後生民多崩迫一磨布德威曠然異疇昔璽書重
嘉歎增秩佐方伯歿官一空幃孤魂嗟久客向非郡人
力胡以歸窀穸至今月旦鄉聲稱重典冊

祖功自百世十葉膺簪裾樸儉寡所營田宅恥贏餘我
聞正嘉中冠蓋充長衢尊者秉節鉞霜威著邊隅朝脫
登朝舄夕乘下澤車再世而食貧父老爲歛歔

脫落曾王父高吟事杯酒田廬蕩無遺我祖承其後力
穡廢詩書強懽慰慈母負米聞閭閻澹然隨所受至德
格頑讒薄俗推善誘溫恭七十年詒謀良獨厚

祖歿家益衰遺孤嗟六歲內無功期親外無立錫地
焚祖母軒一身備顛顛燹烟午未興書聲聞機杼烈風
吹茅簷門外豺狼吹我父足殷憂德音恐顛墜

通籍及壯歲雅志在澄清循良播中土藻鑒著銓衡子
立恥攀援屢爲朝貴傾園居奉板輿養志淡時榮閭閻
延高驂聲華凌上京憂當白日頽中夜以屏營

載旃辭承明皇華歷畿邑謁聞秦寇猖至尊憂已亟驅
馬還入都烽烟道不熄悵望天闕高小臣其何力肉食
詎足謀天地忽崩圻再拜別慈幃穉子寧復恤殺賊臣
未能大義有終畢何人秉國鈞我父遭艱厄止水失從

遊終天恨何極

異代追英靈秩宗備典禮

天章賁黃壚明裡貺

無已

殊恩振末俗臣意豈及此行人式松柏家

聲載汗史吁嗟藐諸孤至行難爲似

少歲承家學高臺振羽翼遭時歷險德遂使壯志失閉
戶弄柔翰朋遊聲漸溢疎亢多愆尤閱世羨簡默鞠躬
雁行內念爲諸弟率

汝熒志未堅汝盼穎早露懷古恣討論所未歷世故高
門招衆指多才失羣附勿羨綺縠榮而厭臬與布先人
當厄時臬布亦未具

聞昔有高士三旬九遇食我貧未及然何爲終戚戚金
張多第宅裘馬耀衢術賦命別憂娛人願安有極讀書
望古人吾當尋所適

貴賤有常業鷄鳴自黽勉昏昏視朝夕志墜筋力緩安
坐飽粱肉白髮忽已滿智慧老益衰有志不獲展奮迅
赴前期莫羨稻康懶

百行信有託孝友當根株本蝕木亦凋花葉將安敷綺
帛羅廣庭五鼎敦中厨大義一乖離終身慘不舒妻子
亦何人乃令骨肉疎

先王別氏族支分旣云久青也介冑人恥附梁公後燕

秦締宗牒懽然接盃酒豈復論行輩官尊者居右照耀
驚閭里自云左右手榮華倏以逝棄擲於何有不如思
本源天屬古所厚

共生天壤間失身備驅使貴賤不同懷安得如臂指服
食謹所需作息有常理勿矜鞭撻威此子亦人子

任棠避徵召蓬居謝州府太守式里門薤水置屏戶終
已口不言美名非所取朱門曳長裾譚讌雜纓組磬折
而周旋無乃自勞苦理亂非我責苟得慙市賈逍遙林
木間清風吹環堵

崦嵫翳白日本以息勞思勞人無靜心夢寐遠奔馳瀉

水任方圓花落隨風吹天命有固然巧拙理亦齊君子
守其常勿爲達士嗤

升沈各異志鳥獸各異羣君行乘華車我行猶負薪下
車感高義自顧非等倫草野難與居在遠猶可欽相思
無終斃吾其東海濱

與張逸人覆輿

仲冬天日短北風吹凍澤汝從山中來示我山中作窮
居增道氣白雲欣有託茲晨奉母還石稜破芒屨登頓
發奇懷孤烟暝白鶴新詩書滿紙紙盡還再索平生鬱
幽憤須臾心瞻廓忽如高堂上蕭然見雲壑又如百尺

松陰巖風落落我行天下久粗能辨美惡大復與空同
文章備矩矱其餘多瑣細真詩久寂寞鄙夫常黽勉惜
哉才力薄汝有出世姿至誠敦古學勿以老自衰古人
事如昨

自采石避兵暮泊漕港

江岸鐘已發江心昏未霽篙師起掛帆笑指北風利琴
書雜僮僕舟小無餘地北人習鞍馬江行每憂悸竊怪
舟人子往來如兒戲南來有客船倉皇說趨避前途列
戰旌江邊亂鐵騎舟人默不語收帆色慘悴數里漕港
隈黃昏就幽邃細雨溼帆檣遙愛燈火處古人逃軒冕

江湖饒暇豫世亂無水陸鷗鳥驚旂旆江南山水好我
來與亂會哀哉同苦辛有酒酬君醉

送趙秋水入都

秋城雨方歇匹馬凌輕陰久陰道路清無乃泥潦深人
生感意氣殺身爲知音曉渡滹沱月醉臥盧溝碓北行
近霜露況汝薄衣衾沙吹白雁哀遊子難爲心吾弟滯
京師異方成招尋冠蓋多風波相將返故林

寓金陵簡諸知己

去家日已久天寒益顛顛山寺俯諸峯竹陰得清寄故
人知我來淩霜枉高轡劇談見古人心膽藏無地今人

喜梁肉鬼神護權利士貧實可醜胡以當君意折東張
夜筵燈下盤殮備子貧與我同乃能致兼味顏熱聽高
歌歌終帶涕泗四海尙甲兵菰蘆有君輩時危耐曲折
我拙非其類

憶山居

世態今如此人生亦何慕嚴風怨草木春到南郊樹步
屨入平沙鳧鷖眩屢顧忽見西山來微茫隔烟霧宿昔
避世心浮雲展幽素朝看漁樵行暮隨猿鳥聚道力苦
未堅人羣被羈住遙指斷山口知是草堂路舉世喜多
端朱門無緩步我性實疎頑常恐世人怒耕種難後時

清溪淺可渡山鳥待歸人百年亦朝露

擬古

高樓臨廣陌中有千金姝採蘭朝結帶裁荷晚作襦葳
蕤閉重闌自樂笙與竽使君驅五馬樓前立踟躕豈無
媒妁言未敢明區區獨居競高節令名冰雪俱

匡廬吟問李饒州志清

汝從江右返正當秋雁分幾時離却鄱陽水衣裘尙帶
匡山雲我聞天下匡山絕飛泉百丈吹瓊雪香鑪五老
沒層雲影入波濤峯勢折聞有陸羽井又有遠公臺李
白讀書心所好至今魂魄應常來我曾東入吳揚帆下

西浙楊子太湖水滿眼吳山北固皆邱垤十載匡廬幽
夢結西江血滿鄱湖熱兵戈遙隔子猷船汝若曾登可
細說

水漲歌

城南之水黃拍天漳河滏河同一川橋頽岸圯行人絕
元雲晝冥無炊烟自從去年九月雪草木焦枯井水竭
黃沙赤汗拜泥龍甘霖目斷蒼生血不虞平陸走洪濤
日月滂沱雨伯勞吏人隔岸沈圭馬婦子衝泥就野臯
我屋多年漏更急門內要須擎簞笠瓦盎銅盆滿復傾
連牀書畫交愁溼吁嗟我生逢世艱兵戈水旱摧心顏

薄俗況多招禍理漳河近徙何時還堤面水高翻地軸
年年霖雨愁顛覆轉禍弭災屬郡人不須斬盡淇園竹
將訪猶龍於晉臬署途中作歌

昔歲來尋燕市酒醉向君堂十有九雪暗泥深晝掩扉
僕子持書瓶在肘今來君忽去彤庭舊遊落落如晨星
豈乏綺席金張譙無情絲竹難爲聽病臥禪房十餘日
騎驢直過行山脊草屨晴穿洞壑雲朝舖細嚼山田石
兩傍積鐵峰迴互傳是淮陰拔趙處過眼雌雄今有無
亂鴉落日啼巖樹甲申之春寇馘張土門出入失羊腸
試看險扼今如此一夫詎止千人當人生落絮風前舞

勝敗茫茫自今古野客傷心夜不眠窺人月向柴門吐

邯鄲行

西風吹落葉颯颯邯鄲道邯鄲兵火後人家生白草我
聞邯鄲全盛時朱樓銀燭光琉璃趙女臨窗調寶瑟樓
前走馬黃金羈卽今富貴皆安在惟有西山青不改不
見遊俠子白日報讐飲都市亦不見壚邊倡華鞋鳳髻
明月瑤舊城寥落荆榛裏樓臺粉黛皆茫茫城邊過客
飛黃土城上憑臨日正午照眉池畔落寒鴉不信此地
曾歌舞探穀沙邱去不迴霸圖消歇更堪哀邯鄲之人
思舊德至今猶上武靈臺

學仙引

少年寡信好萬事隨徵逐常笑學仙人服藥死窮谷患
難損精魂心事恣潦倒我年方及壯自覺形容日衰老
側聞廣成子能爲黃金丹方瞳碧玉杖逍遙生羽翰我
欲從入崑崙巔掃花曬藥浮雲邊縱使學仙不可得也
應高枕送殘年

春雪歌

北風昨夜吹林莽雪片朝飛大如掌南園老梅凍不開
饑鳥啄落青苔上破屋寒多午未餐擁衾對雪空長歎
去歲雨頻禾爛死冰消委巷生波瀾吳楚井乾江底圯

北方翻作蛟龍宅豪客椎牛晝殺人彎弓笑入長安陌
長安畫閣壓瓊瑜獵罷高縣金僕姑歌聲入夜華燈暖
不信人間有餓夫

林慮訪王山人

亂水桃源路荒村仲蔚家綠溪收柿葉留客煮椒茶丹
拱巖前寺黃雲谷口花結鄰須共老踏月度寒沙

遣興

曝背隨農父狂歌近夕暄看山頻倚杖見月自呼樽塔
影橋邊寺鷺聲烟外村棲遲烽火後何處賦招魂
豈敢名高尙山園已定居數椽風雨外萬事生餘避

地尋丹訣傳家有素書天寒松酒熟日日溷樵漁
星月寒流外衡門對浦橋近簾霜氣逼待酒燭花消避
世嗟蟬葉浮名悟鹿蕉天南消息斷有夢入江湖
近開場西地林端結草亭早涼吹散帙夕鳥下疎櫺山
翠遠猶見漁歌夜可聽寂寥雲水外矯首問鴻冥

己丑早春

看竹臨烟榭行吟入草亭雪消春水白沙暖麥畦青戰
伐何時了艱危已備經行年三十一雙鬢早星星

縣壺謁張尙書湛虛先生

結茅飛鳥上秋色滿縣壺白髮增幽事黃冠屈壯圖琴

國朝畿輔詩傳卷十

古

樽山月好風雨老臣孤莫訝披雲至淨名此地無

近津門借宿野寺

抱被溪邊寺征衣入妙香地形兼水陸僧語雜興亡久
雨石門緣先秋塞草黃夜深鐘磬發旅夢忽清涼

將遊大陸東南和張子蔭周子鈺李又吉

平生江海志烽火阻行舟百里滄波近何難策杖遊就
涼尋水檻學道引沙鷗莫待芙蓉落蒼茫澤國秋

七月

七月仍殘暑秋蟲已漸聞驚心如遠客伏枕念離羣草
閣低臨水炊烟細入雲故人隨出處不誦北山文

與諸友遊泉亭寺

樹裏泉亭寺山田一徑斜石開門對井岸落雨衝沙數
子行秋色孤樽就野花暫來慚更去康樂未離家

寄劉葛石

文烈公孫

先世同朝久龍髯復共攀莫忘忠孝裔各保歲時艱逐
熱無高士藏名有故山遺文俱血淚讀向白雲間

廣羊絕頂同伯巖作

絕巘秋烟合蒼茫一氣中此行猶築舍萬事已驚弓雨
沒遙山樹霜催昨夜風陶潛歸去早杖履有人同
久別山園路空慚避世心亂離塵日短高臥野堂深酌

酒依紅樹看碁坐碧岑桃源開復閉此地可重尋

山中回伯巖送至馬服山宿竹林寺明日別去

不盡登臨意黃昏到竹林問人尋草徑隔水聽秋砧雲
落安禪處僧知出世心夜深高閣冷鐘鼓伴愁吟

曉日浮高塔雞鳴野殿開下看雲外路昨夜此中來砂
石搖洛水風塵隔相臺共餐松屑罷分手各遲回

南園社集

小築門依寺長堤樹隱城壺觴分野色鐘磬有閒聲福
性應難改山田尙可耕且將林外酒高枕聽春鶯

贈人

水花亭影外荻路引衡門。避事看魚鳥，傳經有弟昆。晚
山晴隔雨，森木遠浮村。不到幽棲處，誰知養拙尊。

路氏妹江南使來

骨肉何由見，音書隔歲通。雨深楊子驛，霜白趙王宮。旅
食憐空爨，鄉心逐斷蓬。十年慈母戀，淚盡北來鴻。

出郭

出郭驚黃葉，蹉跎欲白頭。一年秋又盡，萬事晚多愁。雪
嶺迴征雁，霜葭隱釣舟。避喧翻憶客，何處覓羊裘。

寶雞巷訪吳見末比部卽訂九日之遊

卜宅依寒水，朝回只閉關。見君當落葉，此地有空山。雨

歇秋仍暖官貧老更閒登高何處好杖履許追攀

清源久客候妹婿路吾徵將自南旋

兩年秋作客此度更淒然家近翻無信人來尙各天亂
沙催岸柳細雨暗江船相見應嗚咽臨風淚早縣

固關

一路蒼烟曲雙崖跨石門隔林遙負水穴土自成村
棗荒城少陶唐舊俗存晚看投宿處鷄犬聚雲根

寄金陵紀伯紫

昔在金臺側逢人問酒徒黃花吟入寺白眼臥當壚
狂仁公卿怪清尋霜月孤園陵看蔓草血淚幾同枯

與殷伯巖傅掌雷飲酌突泉上有懷邊李諸公

近郭傳靈瀨飛花漫石灘影翻孤閣動聲助暮秋寒見
月頻呼酒懷人忽倚闌昔賢遊覽地指點問黃冠

春旱

海上戈初罷方隅亦漸寧風多天旱赤春旱草遲青車
馬軍輸急帆檣戰血腥不眠思往事離亂恐重經

殷伯巖往寧夏依劉撫軍憲評

西極垂天外攜家此壯遊豈無懷友淚不作望鄉愁冰
雪侵雄劍旌旄雜敝裘莫言雙鯉闕城下大河流

晴

不復衝泥出科頭萬事慵
草晴如帶露雲亂自成峯
賒酒憑秋稼占年問老農
怪來香細細澤國滿芙蓉

閉戶

滄海尋無計年華閉戶中
挂衣翻竹露移榻引槐風
交態貧初見繁文薄益工
此生安伏枕未敢怨途窮

寄懷容城孫鍾元先生隱居蘇門

結屋依泉樹鬚眉見古人
衰年仍向學薄俗自相親
萬死扶鋤黨孤忠有逸民
近村成井邑半是舊比鄰
金盃思龍馭柴門謝鶴書
半年常作客萬事此揮鋤
山鳥依茅棟泉花照笱輿
尙嫌車馬聒深谷欲逃虛

地自孫登後高名屬許衡君來前蹟掩更覺百泉清饌
薄供春蔬冠存濯舊纓向時親捧杖谷口約同耕

方爾止來

江左推高隱胡爲今在茲可憐烽火後正值雪霜時舊
好君休問人情我漸知回看春日暖且與醉茅茨
醉臥金陵雪俄驚十七年餘生安塞土無路向江天到
處驅征馬何人守釣船因君念耆舊把酒忽淒然

與張覆輿約居林慮

擬結衡茅萬石間青鞵白袷掩松關心同鸛鶴常依水
名愧巢由却買山草沒金臺邊馬動雲生竹榻野僧閒

肯從曳杖黃花谷爲覓丹砂駐老顏

晚過寧元著

地爐簾閉小堂春燭下開筵坐錦茵幸有壺觴消晚歲
不愁風雪阻比隣歡娛再覓青陽節離亂難禁白髮身
冉冉百年吾自醉莫言人世有風塵

九日遲客不至

今年九日寒太早菊花未放風淒淒野檻無人草亦死
沙村多雨蟲亂啼已命山妻開臘酒頗看穉子摘霜梨
好客不來秋易過况聞西南多鼓鼙

行藏

行藏久已付黃冠手種疎楊倚碧湍樵徑看雲隨蠟屐
山厨供客恃魚竿鷗鳬白汎晴沙澗薜荔青圍野榻寒
不是行歌耽寂樂江湖水渺雁歸難

懷太原傅青主

曾約溪村訪釣竿數年設榻待君歡亂離苦憶良朋少
衰病應愁遠道難晉國山川容白髮中原天地此黃冠
幸將卷帙傳高蹟日向晴窗展畫看

登城南水閣步張覆輿韻

秋光遙入望秋心野莢平橋水半侵病信方書初斷酒
悶登幽閣屢攜琴沙蟲挹露鳴衰草海雁衝寒掠遠林

風景不殊人欲老誰憐雙淚落清砧

答李長文姜漚思二太史

早向空山戀薜蘿蒼藤古樹伴行歌
邊霜夜冷驚鴻雁宮草秋深牧駱駝
近日文章都下好三年涕淚野人多
柴門水隔平橋斷莫訝無言到玉珂

寄宋吏部玉叔

風雨常懷宋玉悲嶽雲海樹遠離離
春生太液魚龍嘯月滿空陂雁鴛鴦
飢先輩風流成李賀同時歌詠附王維
定知脫畧能傾倒竹枝從爲汗漫期

白侍御函三先生祝髮隱清凉山

野寺清齋衲子同石橋紅葉飽天風世情不到孤雲外
心事全消半偈中海國傳來新白馬山人誰識舊青驄
不嫌詩酒污禪地聽法常來就遠公

雪後訪胡遜谷不遇聞赴張峒村莊

歲殘羣向市城忙君獨攜書赴草堂野外人情真脫畧
老來心事易悲涼枯林半露遙山白饑雀低鳴宿草黃
爲問平安窗下竹春風何日待飛觴

秋水避亂出郭借寓小園

西來烽火照邊樓汝亦閒身可自由出郭許同妻子去
移家獨爲水雲留林端避客從張蔚竹下吟風待子猷

戎馬數年心欲折見君飄泊益添愁

無才

窗下平田細路分樵歌幾處遠猶聞濤聲夜落漳南樹
山色晴分冀北雲曲岸人家依紫蓼衡門客到煮青芹
無才合就窮途老車馬休驚白鷺羣

年來

年來萬事總沾巾又見西風動白蘋莫負秋光須縱酒
每逢新月倍懷人嵇康避俗名猶累杜甫傷時懶是真
南北烽煙今更甚天涯何處著閒身

春過

小園春過綠成圓
鳥雀聲聞客到稀
性好遊遨貧懶出
身多閱歷晚知非
漫因白髮憎明鏡
敢恃輕寒換薄衣
聞道潞陽花欲盡
可憐寂寞度芳菲

春郊

晴煙落日淨暉暉
坐愛村橋晚未歸
亂後鶯花春自好
城中車馬客來稀
浦沙向暖鴛鴦臥
徑草初青蛺蝶飛
待到南園花滿樹
相過百徧定無違

初夏東社中諸子

溪邊昨夜長新荷
每向疎陰臥短簑
閉戶十年詩興懶
論交近日酒人多
孤村水濶浮郊樹
小徑春閒帶女蘿

已報甕頭松色老柴門日日待君過

山中回寄吳下故人

西來雲木隱秋山草屨孤筇信往還
半畝家留煙水外十年身老亂離間
燈前濁酒酬黃菊江上殘荷待白鷗
橘柚滿園烽火絕幾時雙槩問吳關

清源寺夜有懷舍弟觀仲隨叔

西風牢落贊公房百里滄波是異鄉
誰解綈袍遮短褐幸留明月伴空牀
雁來古渡天如水葉下秋城徑有霜
諸弟故園黃菊滿卽今何處擁壺觴

靈巖寺

天畔靈巖已昔聞石橋花雨正紛紜
楓林亂掩浮圖出黛色遙從泰嶽分
古殿橫闌迷赤箭秋泉帶葉下青雲
伊蒲會罷僧厨飯倚杖看碑到日曛

雲外笙簧擁碧霞遊人爭看鐵袈裟
虛巖白映山南日老菊黃垂洞口花
溪水過橋喧鶴鶴松根出石走龍蛇
飛梯萬仞棲真地可許尋源問鹿車

長安雜興

黃榆霜老角聲哀萬里風雲塞上來
到處狼裘圍蹴踘四時龍管動蓬萊
憂天憶上劉蕡策失路難登郭隗臺
蕭寺雪深鐘鼓後可憐燈影撥寒灰

日落蘆溝沙亂飛城頭風雨折旌旂囊空尙欲沽鄰酒
秋盡何人問客衣絕域草衰蒼隼健故園溪淺白魚肥
朱門夜夜鳴簫鼓未許羈愁夢暫歸

出都前一日韓聖秋紀伯紫徐德蜚張青瑀鄧叔
奇集龔孝升先生龍松館分韻得真字

十載垂竿愧隱淪暫來京國益酸辛人情漸覺悲歌少
酒客依然意氣真塞外霜高迴雁影松間月小照龍鱗
明朝匹馬燕南路冰雪將無念遠人

張覆輿往依龔嵒使公治久無消息

太行春樹幾重煙老別庭幃亦可憐錦水有人留杜甫

素屏何處覓張顛浮生半寄青山道萬事難酬白髮年
正是中條花滿谷故園遙待紀遊篇

晉陽喜晤明州周茂山

四月邊霜吹寶刀官厨漉酒見絳袍山園樓閣春花暮
人望關門漢月高亂後羨君棲絕域狂來隨地著吾曹
黃昏細語天台寺杖底如聞萬壑濤

夜溪

昨夜山雲黑沙邊見新漲夜靜水空明魚遊星月上

寄伯巖

不愛蘭陵酒還山弄石灘全家住碧空書聲落天外

南園

孤亭高峙滄河干落日松陰下碧湍山鳥亂啼人醉臥
野花吹滿鹿皮冠

宿野刹

醉到禪扉已二更還從支遁說無生幽簾不動空香滿
午夜蒲團落磬聲

寄懷路妹壻吾徵

風雨難招客子魂浮家萬里臥江村姑蘇臺上應回首
白日寒煙是薊門

中原消息問征鴻衰草遙連碣石宮最是愁人秋色裏

江南江北盡丹楓

十年烽火老愁顏
海外孤雲去不還
我昔題詩應尚在
相思常到洞庭山

題人野亭

溪上孤亭草樹幽
月明常醉木蘭舟
門前處處秋瓜滿
猶恐人疑是故侯

黃花谷

竹杖尋源入上方
滿山榭葉晚蒼蒼
亂碑零落遊人少
一道飛泉下夕陽

溪上

微霜昨夜下庭槐
水畔閒登萬里臺
兩岸蘆花飛白雪
午橋煙裏一舟來

茅堂

小院茅堂近郭門
科頭竟日擁山樽
夜來葉上瀟瀟雨
窗外新栽竹數根

泛舟明湖

女牆倒影下寒空
樹杪飛橋渡遠虹
歷下人家十萬戶
秋來俱在雁聲中

清源望路妹婿不至

胥江六月理歸舟
客底霜華塞雁秋
望盡落帆人未到

滿天紅葉下寒流

國朝畿輔詩傳卷十

終

國朝畿輔詩傳卷十一

長洲陶 樑鳧薌輯 寶坻高繼珩寄泉校

張 蓋

蓋字覆輿永年人明諸生有張子詩選

朱葵尊張處士墓誌永年有隱君子曰張蓋以
能詩文工草書亂後謝去學官弟子悲吟侘傺
遂成狂疾嘗遊齊晉楚豫間歸自閑土室中引
酒獨酌醉輒痛哭雖妻子不得見惟同里中涵
光雞澤殷岳至則延入土室談甚洽其爲詩哀
憤過情恒自毀其橐或作狂草累百過至不可
辨識乃已久之狂益甚竟死涵光輯其遺棄僅
得百篇刻之其五言詩尤高簡方諸古人居易
錄廣平張覆輿贈申鳧盟一絕云草澤賢豪盡
上書奎章閣外郎公車我同漁父因衰老獨有
涵光是隱居此與黃九烟詩今朝喜得見尤侗
皆直呼其名以古道自處故以古道待其友非

知已之深者不能也

寄贈李十三郎君

主人十三齡天駒見龍脊絕塵瀟灑姿能解留人客子
時至平千復著遊山屐足繭澀登途盜賊况充斥踟躕
數里間落日藏光赤投宿上君堂張燈照昏夕蹇驢足
芻茭老病須燔炙奴僕亦殷勤自來掃牀席酌酒須玉
瓶傾光泛琥珀感情欲痛飲所恨胸腸窄恭聞爾先人
遺汝登朝舄汝兄善草聖海內稱名碩汝才駕徐陵準
擬文章伯子有兩男兒雞鷺空毛翮大兒倍汝年弧矢
未能射小兒少汝年祇備樵蘇役何以汝聰明日夜親

圖籍老夫若汝年走馬垂楊陌有時叢臺下醉舞揮金
戟中歲好彈琴素琴橫白石旁植一枝松今已高千尺
忽忽鬢髮蒼自顧無良策何處可容身避地來山澤結
交無老少遭時有順逆長嘯望停雲題詩謝疇昔

廣羊山訪殷伯巖不遇

爾從南方來衣裘帶江色舍舟入故山倦游聊憩息我
住君山南君住吾山北相隔十里雲欲見何由得今晨
動幽興獨訪漆泉側危橋上古寺徑轉長松直山僧五
六人亭午會法食清齋到鄙夫益我筋生力老翁氣忽
壯果腹取巖巔初瞻意崒崒絕頂無難陟捫蘿纔躋攀

寸步成匍匐天畔石房古仰望不可極山叟何時還再
欲窺堂闕三步一回頭結鶴烟中翼

出村見山雪

袖攜古人書步向招提路拂却石山雲坐近巖前樹山
雪四邊照淡然無塵慮歸來烟靄中獨與樵夫遇

芭蕉

芭蕉在官舍本與族同居根株偪古垣精色何能舒葉
黃復已破憔悴羞拼欄旁生小稚子低昂纔尺餘苦遭
秋日旱顧爾長躊躇欲待沉陰天移植西庭除前夕動
幽興乃使近吾廬江水足灌溉插竹倚扶疎人情憐小

幼卉草心相如晨起南窗邊秀挺何與與葉心卷青玉
細似篁中簪坐看綠扇長清風灑虛徐窮途如有作梧
葉與同書

戲爲風松屏帳歌惱申子

汝翁愛松入骨髓丹青遣畫圍屏裏三株鐵幹虬龍姿
萬壑秋聲濤浪起松勢盤擎盡左向畫師善寫長風狀
羣雲亂擁松頂樓阿誰冥坐風樓上偃蓋多時不在眼
令人來此空惆悵正如王鐸草書素不惜書絹與君滿
君宅不掛高堂近眼前篋中朽爛終何益

送春行

四月八日春始歸餘春早夏爭芳菲桐樹浮萍葉已大
蜩螗嘶嘶聲尙微主人送春招衆客賦得行酒流光輝
紫帳不遮洲上熱且登梵閣開禪扉青松落陰連翠竹
梅檀繞院香馥馥阿難合掌向人笑摩登伽女來相依
列玉盤酌金盃宛轉肉音隨竹管梨園象樂鬪新聲燕
歌激烈吳歈緩改席芳園開大軒漁郎午食卧桃源此
地安知有晉魏秦時衣服今仍存衆客起舞蹈苔蘚晚
向洲中混遊行不見麻姑散髮垂渾疑海水流清淺還
命酌復徵歌不勝醉暮顏酡水聲幽歌聲好酒徒酩酊
歌洲島前聽折柳後落梅分明共惜春光老起看白日

忽西斜停歌罷飲且歸家人生快意不可極明朝學種
青門瓜

昭明臺呈襄陽諸公

楚郡蟠江腹危樓逼太清窗通高鳥過檻俯白雲生帝
子留文字羣公列治平我來戎馬際登眺獨含情

留郝元直

自得黃溝信常懷見汝期只愁相會少可道故鄉遲陪
酒鄰家夜彈棋日落時明朝各有事分手卽天涯

秋興

兔嶺邯鄲外羊祠楚甸中鄉心堪夜雨旅病苦秋風湖

橘垂丹實江蕉卷綠叢幽姿不可見倚樹獨書空

客中送人歸鄉

雲沒青山頂風含白岸波離情秋更苦歸路雨偏多
小菴臨漳水荒林帶女蘿附書愁不達汝到定相過

殷伯巖招同白涵三郝元直苑西柳霍亮雅申鳧

盟劉資深集飲

屢宿陶潛宅今來得數公竹斜燈影外人醉雨聲中
老惜歡娛異交緣出處同病軀先就榻應恕鹿皮翁

渡沁水宿穆陵關

斜陽明晚渡倦馬踏寒雲岸動移舟影沙喧落雁羣
山

城秋似畫水市暮多聞老客歸心急無眠到夜分

客歸

水闊荆門路君從此地歸雲山開幕雨舟楫帶斜暉計
日程將近從人道已非且尋嵇阮去竹裏閑柴扉

山居張湛虛司馬枉駕山人以予壺餐不備爲展
待因要遂臣先輩

康樂遊山信先期報敝廬宿春供野飯晨掃淨荒廚徑
仄猿相引雲深虎伴居果來尋牧子真氣拂林墟
山翁亦有意招引過鄰家繫馬驚林鳥催廚饌野麋一
燈先好月雜果間疎花甕有蒲萄酒村醪不用賒

月出樓陰靜天晴露氣微
蛩聲斷復響螢火起還飛
隱吏遺朱紱山光上白衣
清談忘夜永相對兩無違

憶舊

城晚砧聲急庭深樹影寒
孤檠憐自照明月憶同看
旅日憑詩過鄉愁仗酒寬
秋天饒夢寐夜夜渡江干

山居秋夜同友人坐月

客宿楞伽宮秋深白露中
雲歸千澗滿月出萬山空
兵甲何時息琴尊此夜同
張華有寶劍醉拔舞雌雄

谿村卽事

羃歷樹中行潺湲石瀨清
野花開間色秋鳥落寒聲
家

往愚公谷書傳老伏生鄰人自來往日見不知名

偶成似湛虛先生

久客成親故居人識漸多自知林下路數向水邊過夕
露凋蒲柳秋風老芰荷病中曾見問詩思近如何

喜郭楚玉至

有序

不見楚玉近五六載其間辰巳災荒未申兵變
不知何以能自存也今病腳徒行七十里艱難
見訪聊書四韻志感

五載一相見乾坤幾變更亂離驚汝在衰病惜人情齒
髮前朝貌丹青後世名談詩悲喜外好雨向簷傾

南征

垂老嗟行役南征指漢陰
長途正雷雨羸馬別荒林
白髮高堂意黃雲日暮心
出門潛忍淚涕泗已霑襟

登海光樓

城遠隨山勢樓高見海光
池霜冬夏白岸樹古今蒼
讓國懷虞帝征苗憶禹王
浮雲看變態倚檻獨徬徨

夜泊樊城

竹樹楓林旅舍情無邊
星月照江城雲帆夜照漁燈小
山閣風傳戍鼓鳴鴻雁不來鄉
信斷兵戈欲動客心驚
明朝白髮含霜露辛苦黃塵道上行

聞張扶隆將歸

謂客南遊未遣知遙傳消息倍多思
江濤赴壑吹沙急海日含山出霧遲
桂檝尙留桃葉渡松醪已負菊花期
陶潛近有歸來興待汝從容一問之

寄題申處士臯盟箕亭

負郭田疇水氣中隱君亭榭白雲通
青連秔稻千村雨香泛芙蓉萬里風
夏簟涼侵高士卧新詩清絕老夫同
欲持百尺琅玕竹向爾漁磯作釣翁

答申臯盟約遊隆慮

西南林壑動高興愛有山村間水村
山入太行盤鳥道

水分瀑布下雲根得同鄭子耕巖谷何異龐公隱鹿門
仗汝遠尋先卜築願將白髮共朝昏

七里峽

朝下縣壺頂暮行寒峽中壺形猶迤邐峽勢已寵提豈
假隨刊力當知造化功水聲流太古石色聳遙空重碧
涵砂礫深紅綴蘚叢暗崖迴北雪高岫阻南風山鬼宜
幽僻神魚老混濛依稀聞唳鶴彷彿見奔猱聞道瞿塘
好常思灑灑雄干戈妨歷覽舟楫廢疲癯此谷聊堪隱
前山幸可通杖藜五指外借騎廣陽東附葛緣明月披
烟坐晚楓回瞻長嘯處何異在崆峒

漫作

玉盤漬墨可二斗高麗繭紙冰蠶紋醉來揮灑興不盡
欲上青天寫白雲

孟亭

不見當年孟浩然魚梁渡口問漁船巖扉松徑空搔首
沙岸如霜月滿天

殷岳

岳字宗山號伯巖雞澤人明舉人 國朝官江
蘇睢寧縣知縣有留耕草堂詩一卷

朱熹尊殷先生墓志先生父太白舉人仕至陝
西按察副使先生少躋弛然篤于孝友與其弟

淵並負才名崇禎三年舉鄉試後數年省其親
入蜀值副使公由遵義知府遷今官時流賊寇
漢中闕南大震分其黨伺副使江上副使將之
官先生言曰今逆寇充斥若順流下必墜賊計
乃請移檄興安命吏卒迎于江潛以數騎由萬
山中出夜抵興安賊大驚以爲神會閣臣楊嗣
昌以督師至惡副使仇直誣以違令致賊突圍
當坐法淵請闕訟寃不得白而副使以病卒先
生再疏爲父乞遺骸歸自漢中及家京師已陷
先生通居西山與淵討賊事泄淵被執不屈死
永年申涵光者素與先生爲友留城中聞賊索
先生急募死士夜馳與賊戰脫先生于難遂渡
河同遊吳越逾年乃還吏部按籍除知唯盧縣
事布袍阜帽騎驢至官舍時兵革甫定先生爲
政持大體與民休息治聲甚著涵光遣書勸之
歸先生遂力請上官投劾仍騎驢布袍阜帽還
里所居鄉曰小砦草屋三楹與涵光晨夕唱和
相樂也先生爲詩自晉魏下屏不觀尤不喜律
詩謂徒費對儷無益性情故平生所作惟五言
古風一體莽莽然肖其爲人遇佳山水輒留連

不去先生外和內介遇田夫野老陶陶雜處至
見俗士而斥之未嘗假以色笑讀書必窮義理
其拒異端邪說尤力知雕窻曰有僧用鐵釘木
室坐其內募金錢男女往膜拜先生怒焚之
僧叩頭乞哀卒與之杖里居有祠曰三教堂塑
釋迦佛像于中而孔子未坐先生過之志甚嚮
所有田改塑孔子於中既成爲義學以教鄉之
子弟先生產雖破欣然意自得也後病死福州
紅豆樹館詩話伯巖弟淵字澄之一字仲泓自
號西山餓夫明諸生甲申國變討賊不克死有
殷仲子詩草詩不減乃兄而已死明事限於體
例未便收入明詩綜亦未載恐遂淹沒附錄數
詩秋雨郝元直申孚孟集小齋見志云肝膽藏
無地鬚眉笑獨貪長懷天下計猶作布衣人懸
亂秋階草飄浮積水蘋二三知已客把酒更垂
綸金陵送家兄宗山入蜀余還里云秋氣臨江
渚舟行宿野光蘆花新下月河水舊分梁事變
歸鄉懶時窮作客長宦情何日盡雙羽在滄浪
雜詩云雄心鍛翎羽整羽生光輝八月秋風起
凌空試一飛雞鳴思祖逖中夜立躊躇明朝身

國朝畿輔詩傳卷十一

九

不死拔劍去讀書我有青銅劍拋擲向山坳樵
人驚未識蓋說斷神蛟丈夫心如鐵行事如明
月弦望各有時
何論圓與缺

讀史

冒頓縱鳴鏑何有乎婦翁齊虜窮計畫和親苟彌縫白
登帝膽落事急聊相從官家居體貌四國少顏容貽謨
累風俗邊鄙詎偃弓若淮陰而在不當歌大風

人言父子親安知不爲虎猛獸惜其雛步步生咻喚漢
武好神仙方士正旁午志慮旣回惘讒夫耦二五齒牙
之爲猾荼毒於耜耨隸臣銜尊命兩宮無靖土以予盜
父兵苟圖脫罪罟九服無逃命望思亦何補

霜雪何將將日月皎光明鉤弋不可活奉車托微誠以
是藐諸孤一旦寄阿衡朝舊擢純篤攬轡見澄清帝星
驚流電桐宮覆典刑公孫病已立草木亦知名世運惟
臧軻幸濟以忠貞妻孥怙烜赫得失苦縱橫禍福有所
常操存舍則亡

聖人無常家一龍而一蛇仲舉獎王室名賢蔚東華相
與張天綱抗節觸奸邪當時王路險駘銜覆奔車庶幾
無道愚踣頓貽咨嗟

亂門不可過懼以傷吾行亂世不可入懼以戕吾生袁
閔憫先祚覩變於未萌蕭然對環堵獨立遺世情弟昆

競驕僭與時爭權衡甘爲所凡愚囊括守其貞漸冉十八載行者無埋名

太阿不在掌神氣積苦窳周德旣已衰子孫失其叙羣雄橫意氣鼎隧啟納侮玉步猶未改王章尙撐柱胡然晉大夫一旦薦茅土葛藟庇本根况乃縱尋斧名器苟不存其他安足數

禮者國之維民者載舟水暴秦虎狼威流血被九軌侈功蓋泰皇一家天下始猛氣隕沙邱難從一夫起七廟墮飛烟旦暮殄宗祀亡秦楚三戶弧矢安足恃

歟雲駕飛龍真人屈羣力扶義西入秦始定三章約衆

爭走金寶何獨收圖籍一軍驚大將關東可傳檄借箸
請前籌詎復有遺策寬大帝王模要在識人傑一增不
能用叱咤徒虛喝

仲事家人產阿渢老農兒福與禍相倚澤麋蒙虎皮江
湖錯襟帶儼爾錫介圭鹽鐵卽山海爲問自何誰不思
底本根乃欲披其枝孽匪降自天六豎同蚩蚩雖由
博局几杖失之慈

謀國如搏虎噍血滿朝市衣裳自顛倒于錯安足恥袁
絲炙轂輓魏其狙風旨條侯眞將軍自茲多積毀嗟哉
天下事認真亦徒爾

唯則可定國婦願亦何極一子爲天王一子分桐葉寵
宴隆私恩誤信千秋約牧犢不顧車盍旦翻日月福薄
不知載隕身竟何益

革心舞千羽革面血標杵漢武勤遠畧八荒無寧處郊
祀歌天馬祖禰詫官呂奪我燕支山庸有利乎女夜郎
賈茹醬間使出深阻靡敝憂鬼神四廟無餘祐輪臺下
尺書不者亡秦緒終漢無外擾尙論所節取無德易以
亡聖言久淪胥

周公負成王弗陵踐天子高卑旣已陳旦夕遵塗軌小
人追喪軀截趾而適履刺侯生燬隙上書恣詆毀將軍

謝免冠少帝燭奸詭牆茨不可掃婦人安足恃

遠畧不可勤衆狄不可速老臣數軍實遂上便宜策留
屯飭武備居民并田作罷騎省度支致穀著威德羌衆
以崩離我師過枕席當時訟盈庭便支多勾棘如彼九
牛尾度越烏從測

伏波天下士遨遊而擇主真人崛起東方濶達符高祖旣
見一乃心披帷籌二虜聚米爲山谷指畫同目睹八區
尋大定奇坊勒銅柱後世訟神人譚言中繩矩古道不
可期宵人譁市虎

太妃殊風軌徽音不可屬伏波有小女亶亶多儀則正

位長椒宮揅然加謹肅裳衣大練裙無所於緣飾建初
爵諸舅危言念傾覆樂以貴人下知於身取節先臣遺
家訓天姓光竹帛維先之以善後乃報其德

道隱禮爲基世亂聖人生仲尼駕奔車誰復覩未萌延
熹皇路仄雕琢名士傾購募同寇敵使出車交并號咷
日月黑撈掠血肉橫相傷竹亦枯歲寒失堅貞當時箕
潁濱可尙光遺榮

孤貴易失和露才亦瀕危當時賢智過抗稜長風規載
禍日相餉幾令無子遺林宗步高衢尙志不繁詞敬遇
貴賤士壹之以坦夷明哲保其身可奉以爲師

登岱

石蹬躡高危仰見日觀峯赤丸湧滄海星河淡遙空天
雞發先唱聲落野雞中俯視羣山巔風色初冥濛
十載上太華春仲陟嵩高希夷夢未覺子晉笙嚶刁平
眺西南雲聯車列旌旄升茲玉女堂勞之以香醪
徂徠列前楹濟深濶衣帶衆山皆俯伏儼如朝王會明
堂不可復漢秦失驕汰惜矣大夫松徒增後人嘅

客官渡除夕詠懷

世故纒牽長御之無其道我非好貧賤禽鹿終悅草擔
荃糜歲華幽谷窮探討古人於隱淪稱心以自保

劉逢源

逢源字資深號津逮曲周人順治間貢生有積

書巖詩學迂軒稿

四庫全書提要積書巖詩選劉逢源撰逢源與
同里申涵光相唱和是編分初集二集後附前
後漫興詩各五十首逢源生當明季崎嶇轉徙
於江漢淮海之間故陶憂之語多而和平之韻
鮮焉

曲周縣志逢源少好讀書經史星數河洛之學
悉能解會喜談兵好擊劒嘗手鈔二十一史譬
對精確又他書近千卷一時名士皆
從之遊著有積書巖及漫興等稿

雨餘

雨餘一杖輕林塘引秋步溪漲石梁平別尋花間路徑

轉岸稍頽邱壑莽回互奇石擁秋花寒苔蝕古樹孤亭
不逢人偶得閒中句石磴久徘徊林外山光暮

詠懷

交道未易言其要在慎始世情多責備投桃冀報李勢
利有衰歇緩急終難恃所以耿介流深山伴鹿豕我有
縞帶交古道頗相砥素心住南村烏巾在錦里樵蘇每
不爨清談而已矣投分等石交相借沒餘齒

二日雪

正月朔二日夜半寒氣濃晨起欲出戶柴關凍雲封撲
窗八簷隙漫天舞玉龍小溪如銀海遠岫似瑤峯躡屐

呼童子掃徑招山農牀頭一壺酒尙可壯衰容不憚崎
嶇至蹊深沒瘦筇酒闌多感慨所向意皆同人無金石
姿仰愧嶺頭松得酒且共歡富貴良無庸酒盡過溪橋
西原聞暮鐘

九日登赤壁

九日至黃州欣然獨西笑赤壁落吾手於焉恣游眺一
杖陵層崖剗然發長嘯把酒呼魚龍踞石登虎豹小亭
遺像存長髯側烏帽卓哉東坡叟煜煜神光照羣兒戲
弄兵蟻鬪何足道想公弔古心還爲後人弔鶴影落寒
空笛聲來遠棹杖策下荒岑江烟起漁竈

詠懷

少年不自量意氣何崢嶸思一吐奇懷厯抵漢公卿中
歲事乖違烽烟暗兩京遂戢飛揚志殊深林壑情家貧
迫衣食不敢薄躬耕頽然一野老井臼困柴荆每赴雞
豚社閒尋鷗鷺盟陋巷甘偃蹇聊以善自名

歲暮有感和陶

畸人不偶世僻性耽林泉本無經濟術坎壈何足言石
田薄有秋食指漸已繁耕稼豈不勞庶幾免尤愆故友
半淪沒酒壚邈河山委巷閉蒼苔鄰里絕往還禽尚有
遠志惜爲婚嫁牽一日復一日長往竟何年白髮盈鏡

中形隨大化遷餘生如過鳥歲暮增慨然

訪友

偶爾穿雲去沿溪一徑斜庭堪羅鳥雀園只種桑麻細
帙開詩草茶鐺沸浪花倚松閒話久林影亂昏鴉

過竹瓦店

風霜連日苦驢背喜新晴草舍炊烟冷松陰石路平梅
搖寒日色苔咽野泉聲去去從吾好漳千有舊盟

朝來

朝來天氣好倚杖一長吟竹色埋荒沼山風度遠砧石
奇存畫意琴靜寫秋心清淚知何物淒涼鶴在林

溪光

溪光明落日淡性與秋宜
發菊蕊幽徑寒匏掛短籬
泉聲爭赴壑葉影半辭枝
鄰叟閒相慰浮生莫浪悲

秋村卽事

夜來山雨過寒氣入秋衾
野水多歸壑林禽有靜音
簞瓢無外慕鷗鷺識閒心
久矣甘雲卧浮生任陸沈

朝來

朝來山雨過石蘚繡青紅
躡屐尋溪友扶筇數塞鴻
瘦香凝野菊寒豔發霜楓
頗悟年來事浮雲過眼空

訪友

子雲塵外宅花底出炊烟旋摘簷前果還烹雨後泉雞
豚侵虎落鷗鷺上漁船戰伐何曾見桃源又一天

村居秋懷卽事

空山寂寞野人家巷古溪深靜不譁屋角老槐飛敗葉
庭中寒蔓引秋瓜霏微菊畔茶烟冷宛轉橋頭竹徑斜
晚有鄰翁雞黍約一尊溪上醉秋霞

無端華髮滿秋簪四壁雲山響素琴何處寒花矜晚節
幾年風雨老文心香來始覺蘭當戶月到方知鶴在林
杖履荒原覓天地一溪松影隔雲岑

漫興

皓髮低垂照酒卮琴尊隨分展雙眉客嘲元白輕楊子
天問參差費楚詞誰復覩焦鵲得鹿詎甘曳尾憚爲犧
不知黃綺當年意何事時清尙採芝

和秋水韻

自甘抱拙守東岡一卧雲林歲月長野水到門晴放棹
博山欹枕夜焚香松聲無賴驚幽夢花影多情戀夕陽
牢落壯心消欲盡愛聽童穉咏滄浪

己亥冬懷

寒裂冰紋響石渠滿天風雪困樵漁藏名何必逃吳市
高卧猶能讀漢書已向琴尊消歲月無勞鐘鼓饗爰居

茅齋土銚炊烟冷委巷誰來長者車

短髮

短髮蕭蕭不受簪每思方外散幽襟行藏何必關人世
歲月無多閱古今秋漲有時侵舊路白雲常自滿荒岑
浮名不願傳都市肯向長安浪碎琴

獨坐

笑語清尊誰與同寒花繞砌一簾風窮通莫向成都卜
得失應輸塞上翁此日閒心依硯北何年精舍築熊東
杖藜獨坐清溪畔楓葉秋林萬樹紅

薊門秋興

微霜昨夜下邊城小隊輕裝獵晚晴箭似餓鴟雙翼墮
石疑伏虎一軍驚桃花馬飾黃金勒竹葉醪傾白玉觥
醉尉灞亭誰敢問夜深毳帳打毬聲

無復熊羆守翠微行人駐馬立斜暉人間已見傳金枕
篋裏徒驚舉玉衣雁掠荒雲啼隧道鼠緣古瓦下園扉
經途誰奏通天表淚溼龍髯願已違

秋日漫興

稍喜世緣貧日少何妨邱壑寄餘生漁樵堪作閒中計
雞黍聊尋世外盟兩岸蓼花晴放棹一龕蕉雨夜譚兵
牀頭龍劒時時吼五嶽胸中似未平

別墅留僧夜話

竹杖芒屨筍簪冠
籬頭缺處望烟巒
半生可惜貧中老
萬事何當悟後看
瓶粟無多憂鶴瘦
春衣初試怯花寒
無心收拾閒風月
煨芋焚香對懶殘

贈路安卿

君去洞庭今幾年
南天悵望隔風烟
變名吳市同梅福
飛矢聊城憶魯連
三徑歸來亦偶爾
一壺相對各淒然
知君不是烟霞客
別有深情託杜鵑

雨後

溪外復長林
山深近太古
鳥語弄新晴
花光留宿雨

秋溪

溪光透籬入悠然萬古心明月隨孤杖秋聲入短琴

郭泰

博帶雍容七尺身遨遊郡國擅人倫如何下士驚相慕
只倣先生折角巾

阮籍

登山臨水興何窮故壘摧頽落照中醉發狂言呼豎子
英雄老淚溼秋風

种放

賢母相將老一邱石田茅屋豹林秋昭文司諫新銜貴

爭似雲溪老醉侯

補鍋匠

高隱昔傳磨鏡客奇蹤今見補鍋人若將姓字留天地
雖作巢由亦外臣

山行

寂歷空山鹿豕蹤石梁苔滑杖孤筇岸花零落隨流去
秋到溪南第幾峯

趙湛

湛字秋水號石鵑永年人有玉暉堂稿

王士正漁洋詩話申梟盟涵光稱詩廣平開河
朔派其友羅澤股伯巖永年張葢覆壤曲周

劉蓬源津逮卽鄆趙湛秋水皆逸民也諸子既歿惟秋水無恙余丙子再使秦蜀於褒城驛見其登太行一篇信是奇作惜不記憶其全太行高萬仞絕磴躔雲間雪壓雁門塞冰齊熊耳山

省心吟

玉函藏寶鏡光瑩若冰晶三時不拂拭便見雲烟生撫躬問方寸百歲空營營五色亂我目六欲牽我情苟不自琢磨安得常清明芳槩接前哲黽勉崇令名

博陸傾漢冊偉績方伊周不學慕厚勢帷闔生愆尤豈有廝養兒束髮皆封侯台光一夕沈樓觀成榛邱今古理不遠慎以道自謀

上蔡有鄙夫困窮羨倉鼠挾策干祖龍感激去鄉里抵

掌取卿相乃欲易天子所謀一不臧凋零自茲始東門
悔初念機發不可止

溫清理亦常閔曾號佳嗣百行此其源立身首孝弟茲
義苟不充浮名盡糠粃試問平生心胡爲皆昧昧

鄙吝不入道貴以義爲衷施予苟無節何以旌崇庸麥
舟光前史指困傳江東卓哉管與鮑千載誰雷同

曉登關山望六合有懷黃遜庵明府

山口掛殘月樹色曉青蒼登危陟層坂厯險凌崇岡力
衰五步歇僕夫相扶將下瞰同旅人僂僂行趨踰顧余
頭白翁驅策游何方故人有黃子綰綬宰江鄉疇昔枉

尺書走使過洺漳溫語慰衰朽冰雪灑肝腸吾里值歲
儉盡室無宿糧老妻裙不完稚子充糟糠苦被八口累
奔走道阻長黃子敦古處不與俗士行車笠有前期久
要應不忘

贈太平馬學博

名山不在高名泉不在深所貴清冷色玩之怡我心之
子山川秀冲懷寄遙岑六十困寒醺白首無知音丹室
偶然遇蘭雪生我襟高話對微雨如聽松間琴契合各
有數傾蓋比黃金

我友殷宗山疇昔宰濰水式廬得澹臺佩之等衡芷分

手三十秋逝波去若駛垂老感知遇淚下不能止流水
與高山古人復可起

貽我白雪篇蒼茫發瑤采傲若松與柏雪霜色無改捧
讀不忍釋浩淼望滄海緘之玉函中披閱對吉靄旦暮
秋江濱芙蓉共君採

武勝關

草店亂山口巖深隔暮嘯皇圖三楚盡列宿九河分控
遠客巴寇關貧減戍軍秋風南羽便寄謝洞庭雲

秋杪劉雲麓使君招集春雨草堂

罷官仍愛客高會趁名園江上春猶薄林中花正繁朋

倚俱舊好談笑此芳樽那復忘知己侯嬴敢贈言

道經鳳陽

飛樓縹渺海雲孤山頂星壇定有無不信青田占氣象
還教赤縣變荒蕪瑤臺歸鶴悲遼水玉寢啼鵲拜鼎湖
聞說梵宮遺寶衲月明珠樹少樓烏

訪張天池兼訊楊觀察筠谿

裴子巖邊新卜居六年烽火斷音書相逢應訝形容老
失路真慚義氣疎戰伐何方尋樂土饑荒吾里漸邱墟
峴山若遇羊開府憶否漳南舊隱廬

襄陽懷古

帝子高樓歷劫灰江天春色引登臺九方戰氣烟中盡
三楚雄圖檻外來不見龐公棲隱地猶聞元凱濟时才
百年興廢空搔首飄杳衡陽去雁哀

春江芳草憶王孫夢裏陽臺枉斷魂湘珮不來湖水濶
巫山遠望暮雲昏漢宮草沒笙歌地詞客烟消翰墨園
揮手正堪招孟六千秋酬唱一開樽

周 鐫

鐫字茗柯南和人諸生有葭里集六卷二集六
卷三集五卷

四庫全書提要葭里集六卷二集六卷三集五
卷周鐫撰鐫屢試不售棄舉業專力爲詩與廣

平申涵光游故所作不失矩度而才地頗弱僅涉唐人之藩籬魏高介序是集稱其詩溫潤清脫在唐人項斯馬戴可

以伯仲蓋舉其近似耳

題清泉寺

踏破蒼苔去斜陽野寺中臺高留晚日樹遠起秋風設想身何處探幽意不窮寒昏木葉下天際有歸鴻

過申晁盟箕亭

一路皆烟水真成靜者廬家貧心自遠身老世能疎名籍逸民傳功留種樹書燒燈酌午夜明月近庭除

國朝畿輔詩傳卷十一 終